

畿輔通志卷二百六十六

國朝十六 滄州

列傳七十四 列女二十二

國朝

滄州

劉燾妾張氏燾明嘉靖年間官侍郎年八十始娶張越七年

故張誓死守節壽八十七歲順治初年卒

府志兼採新輯州志

賈允迪妻吳氏允迪明崇禎進士官汾陽知縣卒吳年二十

六守節子廷爽成進士官鄆縣知縣卒年五十八

府志兼採州舊志

庠生劉彥妻呂氏年二十三守節四十八年訓遺腹子雯亮

入泮順治十三年旌

府志

宋起鳳妻張氏起鳳順治間官廣東知州以憂歸直督郝薦

舉博學鴻詞不起張以詩名

張氏寄外書嗟乎先生今乃遽成南北耶往夏祖帳白露訂歸

繫柳而去數雁期來羽奴之託雙鯉三剖蕉園之想一鹿百
迴旣詫風雨重陽好花空惜漸驚椒梅歲晚殘月徒憐日望
白駒之征塵遂爾青山之坐老加以隴上弄兵漢北入寇鑑
湖帆張香閨鈴語今則繁紅怨鳥輕碧愁烟子規血竭於五
更杜若芳滋乎長日闌珊春色白日淒其先生具休文之弱
質抱馬卿之病腸賦買多金爲凌雲而作客笈攜千里因締
蘭以去邦初擬社結白蓮繼歎居同仲蔚夫燕趙號多佳人
豈陳雷不圖良覲花塵走馬柳席流鶯細腰驚鴻皓齒迴雪
琵琶光出塞之容玉笛豔進宮之媚蛾眉素馬上之妝螺黛
潤車前之頰催詩徵字賭曲按歌雖顛老別榻亦當遷置鳳
巢卽倪癖清懷終爾交聯鴛譜知斷腸適值江州醉心更在
茂陵卽以先生年高陳思狂追阮籍縱不能錦幕布情豪於
十里亦終有新詞構詩媒於百章名士悅傾城固應若此才
人多薄倖信所云然妾以淺識窺此素心將謂先姑早世堂
上鮮垂鶴之容壯弟成材庭下出擬王之榦王母溫清可託
大人饋饍有加長女譜繡鴛鴦女塾師時稱班媼兩兒韻嶺
風雅男教授又屬謝姬嘗使畫眉語影之心日逐麝桂煮珠
之隊故園鹿候人籠禽喚客靈封昔日芸書蟲蝕當年錦瑟
先生不賦大刀其在是也妾聞之梭中織字感而言歸恨裏
寄吟愧而解渴西風動尊醴於張翰玉關乞酒泉於班超異
世同轍相思并驅竊謂山右之地處詐晉之遺烈鄰西戎之
競風郡縣緣山作國民人耕石成田錦繡珠玉旣仰給乎江
南山川風俗誠易趨乎漠北丈夫好氣任俠女子獻媚取容
少涉歲荒卽起揭竿斬木久遇國難必致分土裂疆雖酒家

胡時堪壚頭醉色而闕氏地恆憂馬上治兵先生第知一時
之處堂甯念百州之決野獨不憶犧繡參諸宗廟其終也與
兔豕同鷄帷玩諸宮房其存也偕桎梏等將桑蓬天地之心
爲塵草鷗沙之寄哉先生居恆每詩癖賀囊字破雲徑一日
不嘔肝午夜不息榻羈臣海外正足成騷流寓嶺南差堪作
賦何賓鴻歸自塞北不得繫帛琳瑯言鳥翔本池西僅存書
函烟墨甯非席上之製薦諸旗亭客裏之搆噪諸樂部耶一
歲之司令已見青帝謝權期年之旅遊仁望德星載轂拂此
綠陰之牀拭此蕉紋之簟曬此鉛痕之書煖此博山之鼎眺
紫氣於西來占浮槎於南至女篋敗葉讀我蛩吟客裝新編
徵君峽外苟片言之符家夢庶異地之想同時子女
喝喝家人嘖嘖興言及此情也何如 滄州詩鈔

某妻何氏名瑤玉金陵人夫名佚氏工詩詞王國均選其詩

著之集

同上

庠生李廷楨妻王氏年十七夫亡守志養親

康熙志

姑卧病九

年朝夕侍牀褥無少怠

大清一統志

守節四十五年康熙九年旌

府志

李震成繼妻張氏幼失恃明末流寇至父被執氏偕幼妹投

井爲橫木所梗得不死寇退鄰人出之見父屍一慟而絕姑
父劉救之甦遂育於劉時年十四逾三載歸李數歲震成成
進士官至陝西布政氏相夫讓產贍族時以爲賢康熙三十
四年卒壽七十

張祿妻孫氏祿明指揮年十八死於軍氏年十六撫孤守節
壽百有四歲卒於康熙三十六年州牧李旌其門同時張宏

芳妻韓氏善事舅姑訓子守節亦壽享百齡

俱同上

臧際泰女性至孝年十五父病篤女禱諸神願父病愈割肉
爲祀疾果痊女乃割左臂肉供諸神前時康熙三十七年正

月元日也

州舊志

韓國長妻張氏性至孝事繼姑以禮同族韓懷西妻李氏姑

性暴嘗以剪擲傷氏面敬恭無怨言時稱孝婦

新輯州志

職員王夢蘭妻李氏性貞淑侍姑疾年餘不少懈嘗買婢知爲宦裔爲擇婿厚遣之僕貧欲鬻妻出錢完聚子三琇雍正

二年舉人

州舊志

庠生吳坦妻胡氏孝事舅姑嗣子汝仁由副貢官鹽大使苦節四十三年雍正四年旌監生吳士琰妻劉氏年二十四奉姑教子苦節四十年雍正五年旌

雍正志兼
採訪志

庠生龐夢嵩妻孟氏性好善樂施濟雍正八年州大水行者病涉氏捐義渡二以便行旅州牧旌其門

州舊志

監生王澤貴妻劉氏事親以孝聞子應典雍正十年舉人同時庠生劉嘉善繼妻曹氏相夫盡職訓前室子如己出子連

芳紹芳均舉人

州新志

劉自成妻李氏早寡守節事舅養葬皆盡職訓子重慶人庠

氏歿後居室異香半載始息

府志

庠生呂伯龍妻劉氏伯龍病日幾瞽氏朝夕籲天以舌舐之經歲復明後以勞瘁卒庠生于士宏妻龐氏幼事繼母以孝聞年十七于歸侍姑病晝夜不倦又于總李之欽妻王氏舅病革醫者束手氏割股以進疾爲之痊

王季春妻梁氏夫亡痛哭不食自經而死

邱濬妻吳氏年二十七守節事姑盡職姑歿泣血喪明卒年

七十

俱同上

張文炳繼妻沈氏幼聰慧通經史年十七歸張勤必循禮文炳官廣東參政北上氏留粵知有大獄卽日治裝歸文炳得免吏議時以爲智性好善戚屬有緩急脫簪珥助之無吝色文炳歿時前室子延緒方十齡氏親教讀延緒妻劉氏以孝

著府志參攷
滄州詩鈔

庠生李瑤妻左氏夫亡守節自訓諸孤四子皆登科卒年七十五歲

梁光裕妻于氏光裕未婚客遊不返舅姑令改字氏不從乃歸之梁舅姑皆年耄而貧乃傭於節婦李氏得值以養越八年舅歿姑復諷之對曰兒去姑何以生姑爲泣下又三年光裕忽歸乃具禮成婚時年已三十七歲

馮大妻張氏大性癡有僧慕張色與其姑謀欲污之張不從凌逼之拒愈峻張歸泣訴於母母怒欲與理張懼播姑醜改顏慰之是夜自經死

庠生王用吉妻姜氏年二十夫亡又五載舅姑繼逝遺夫弟瓚撫之成立舅所付千金授之封識如故後以瓚子言爲嗣

言舉人

庶常戴寬妻胡氏夫亡躬親操作守節三十餘年寬弟寅官江南嘗寄金爲氏養贍資後寅罷官歸貧甚氏出所寄金付之

劉元耀妻趙氏年二十夫故絕食數日姑以子幼爲言乃勉

進餐守節終身

俱同上

舉人左方燾妻張氏延緒長女名貞範晚號堅樸幼讀書慕陶靖節之爲人顏所居室曰靜寄齋及笄歸左始學爲詩孝

事舅姑佐夫盡職

案滄州詩鈔云張宜人性高潔喜讀書垂髫從父授書通曉大意稍長讀老萊接輿

婦傳驚歎曰世固有若而人真可高山景行矣能自鐫小印畫仿倪迂獨不作詩謂非女子所宜及迨歸方定齋有句云掃室焚香寂坐餘幾年亭館樂閒居於今更得同心侶五夜挑燈伴著書乃選王孟諸家詩數百首手錄讀之始相唱和而德性益歸純粹晚年尤愛靜終日閉目默坐間爲小詩似頌似偈不復存稿

庠生于覲宸妻邱氏年十三于歸性好善里黨有急難助之無吝色晚歲目盲越十年復明乾隆元年壽九十三歲

恩賜棉絹粟肉閭里榮之子克溫貢生

州舊志

職員呂炯繼妻劉氏撫前室子有恩以樂善好施稱

班某妻洪氏磚河鎮人年十六許字於班班繼母悍欲退婚父母從之氏執不可及歸班姑虐遇之禁同處且逐班班將行予退書誓不歸氏碎其書誓死歸守越九年知班在津偕父往跡聚僅七月班病卒氏遺腹生男全德撫之苦守終身張文昇子婦王氏姑病篤氏割肉以進疾爲之愈又臧於信妻柴氏姑疾革亦割股醫之愈

孫能功妻戴氏年二十四撫孤事姑守節姑臨歿猶呼爲孝婦監生呂旻妻傅氏事姑孝姑歿哀毀幾殆

張某妻郭氏年十九于歸張疾不起父母欲奪其志誓死不從孝事舅姑歷六載張卒自經以殉

宋奎朱繼妻趙氏幼以孝聞適宋姑感其孝令迎養其母氏事母與姑二十年如一日姑卧疾奉湯藥三載不少懈及卒喪葬盡禮夫繼卒氏撫孤子瑋成進士越數年母卒以哀毀終年五十三歲

張超妻章氏年十九歸張九月夫亡祖姑勸他適引刀截指以誓乃止撫遺腹孤恢宗守節三十一年卒

監生張爾鉦妻張氏孝事孀姑晝夜不離側姑歿哀毀逾禮夫經商於閩十年不歸氏撫幼女營家計無失職尋詣夫所逾年生子法良甫周歲而夫卒氏攜子女扶柩歸葬卒年七

十六歲法良以武解元聯捷進士

俱同上

馬福德子婦張氏年十八于歸數月夫亡父母舅姑勸他適

張氏哭不食死

州新志

張某女長姐劉傑童養婦也傑外出四年無音耗女歸母家其舅迫令改嫁女不從投井死乾隆十四年旌

王福妻宋氏宋乘龍妻陳氏乾隆十五年宋年百有二歲陳年百有五歲并建坊

葉選繼妻劉氏年二十歸葉甫三月夫故撫前室子成立孫治成進士守節五十年卒乾隆二十一年旌

按州舊志有葉選妻劉氏不載

事實似即此

田超女有惡少李佩欲強污之女堅拒不從捐軀明志乾隆

三十三年旌

吏員孫繼妻王氏乾隆三十五年年百有五歲建坊旌表同

俱

上

祝純連妻曹氏夫病卒絕粒七日殯畢慟絕復甦卽於是夜

自經死乾隆四十四年旌張鋪妻于氏輓曹氏詩林下高風何處尋冰霜節操冷森森雲窗長

掩曾窺鏡玉案猶張舊理琴七日啣悲明大義一朝撒手見貞心從今閨閣增坤範長使同懷淚滿襟祝純琮妻吳氏

輓曹氏詩漫道千秋恨事多今番恨事屬曹娥淒清露冷門前日落寘塵封壁上梭三載除軀身似鶴七朝泣血淚成河

已知完却冰霜節那問盧名更若何滄州詩續鈔

張烈婦夫某乾隆五十五年歲荒隨夫覓食中途相失訪至

豐潤吳谷莊遇無賴子欲強污之不從被勒死事聞旌之如

例遵化知州傳修張烈婦傳贊略烈婦張氏者家滄州其夫姓名不可攷乾隆庚子值歲荒隨夫外出中途行相失氏

訪之至吳谷莊日已昏無住所里有崔璞者素無賴見其窘給之曰吾知若夫所顧夜暮奈何盍至余家少憩明晨同往

可必得氏以迫於見夫又嫌於露處也冀其家有女伴可暫依不得已尾之行甫里許以足繭藉地少坐璞乘間欲污之

氏堅拒哭且罵璞恐其聲聞於路也扼其吭勒而斃之翼日里正以事聞於官得凶惡訊如律爲請旌建坊入祠

贊曰婦生長窮家未嫻姆教而遇強暴抗節不屈如是嗚乎烈矣爲藁砧故而匍匐荒郊其志可矜未可以行露論也

遵化

州志

劉燭母某氏乾隆五十七年壽百有一歲里胥欲爲報官請獎固辭弗願或詢其故答曰貧嫠顛連困苦或爲神道所憐得此壽耳一邀過分之福則死期至矣

魏西雜志

馬落坡賣麵婦某氏家貧事姑盡孝恆自磨麪夜夜徹四鼓

如是者二十餘年

灤陽消夏錄

訓導祝純琮妻吳氏烈婦曹氏嫂也閨名端淑字秀嫗淑慧

工詩著有月窗詩草榕花閣詩草女韞慧字鈺章適廣平諸

生呂爾爽亦以詩名

滄州詩續鈔

庠生吳茂椿妻張氏南皮進士張慶長女性端淑事舅姑克盡婦職鍼繡之餘不廢吟詠顏所居曰繡相齋所著詩集曰

繡相齋詩草劉思銘妻李氏名蓮芳字純卿鹽山貢生金芝女庠生孫德有繼妻陳氏名玉秀字德華錢塘諸生芳綬女均能詩李著有聽雲樓詩草陳著有南樓小草清韻閣詩草

同上

葉遠繼妻劉氏性慈儉知大體訓前室子汝蘭汝芝入官有政聲年八十五猶率子婦紡績不輟汝芝官浙江按察使時氏謂之曰今人輒言雋母事吾以爲有心反之必不能平時以爲名言汝芝妾牛氏年二十七守節三十一年卒

州新志

董芳妻姜氏事舅盡孝訓子友筠以進士歷官觀察同時劉櫟元妻孫氏孝事舅姑孫無出爲夫娶妾蕭氏生二子次仲

珥官涼州知府

高鈞女四姐年十二挑菜於野有無賴子胡成欲強污之不

從被殺嘉慶六年旌

王永凝母劉氏嘉慶十四年年九十六歲五世同堂呂鐸妻
王氏嘉慶二十三年年八十五歲五世同堂均旌

沔陽知州葉治繼妻王氏性明決曉大義治宰鄖縣時教匪
滋事氏儲死具謂治曰脫有不虞不令君獨死也悉出所有

賞士卒士皆感泣效死城賴以全

俱同上

貢生葉伯儉妻全氏名淡真字菊如涿州全材女聰慧工詩
著有曉香閣存稿氏早寡守節子圭書圭綬均舉人圭書妻

李氏名繡英能文工書亦以詩名

案滄州詩鈔全宜人早寡教諸子嚴明有法次子圭

書以祖廕爲縣令宜人不令謁選勗之曰縣令不易爲非讀
書明理何以膺民社晚年以家政付子婦日手一編吟詠不
輟詩筆雅秀天成無烟火氣繡英爲江西鹽運判宗湖
女于歸後未幾卽故字體清瘦索其遺詩僅得二首云圭書

繼妻張氏性寬厚相夫盡職圭書官山東按察多所資助

新州

志

監生左善洵妻李氏任邱翰林院侍講學士中簡女以能詩稱著有麗景樓詩草傳於世

滄州詩鈔

鮑拭繼妻趙氏孝事繼姑撫前室子廷燦廷燿廷燕如已出廷燕舉人己子廷奭入庠卒年七十四歲

州新志

葉乾元繼妻于氏年二十一夫亡治家嚴肅訓嗣子有義方嘗曰子非已出而故示寬容是博一己賢名而縱子不孝也人以爲名言道光十二年旌

職員王雲翔妻紀氏性至孝侍姑疾不假婢僕歷十餘年如一日子六登科者二好周人之急道光十五年入城途遇丐數十人命各與之飯衆叩謝時一笑而卒年六十九歲

苗芬妻王氏年二十七夫亡侍姑疾歷數年不怠教子成立

戚族有急恆脫簪珥周之卒年八十一歲道光十九年旌
褚慶長妻武氏年二十四夫亡姑老病子甫三歲勤紡紝以
事以育卒年六十有八道光二十三年旌

庠生張天衢妻蘭氏舅與夫相繼歿氏撫孤守節年至七旬
日侍姑側無倦容姑歿哀毀失明子召棠舉人

丁大武妻李氏翁歿關外大武以迎父骨資竭歸尋卒氏年
二十九益勤紡績數年集資骸得返或疑真僞氏曰聞翁醉
後顛仆折半齒驗之果符又數年姑卒喪葬盡禮撫嗣子成
立卒年四十三歲

庠生尹嘉訓繼妻呂氏年二十三夫亡家貧甚撫前室遺女
并日而食女長適人數年亦寡依氏以守未幾女又卒氏性
介年五十九以貧不能存自經死